

四庫全書

集部

欽定四庫全書

容春堂後集卷四

明 邵寶 撰

墓誌銘 十四首

明故通奉大夫河南左布政使楊君墓誌銘

正德癸酉冬十二月三日河南左布政使楊君名父以  
入覲北行卒於衛輝之驛舍汝府陳長史某以其介子  
孫辰殮其冢子國子生孫元自京師奔至奉其喪歸奉  
京兆楊公方震狀來請銘予知君久比又得君之詳於

其姻友都御史魏公士華近聞君調江西說者謂將遂以君撫巡予日計君南來而不意其至是也烏乎惜哉君諱子器名父其字別號柳塘世爲慈溪人唐宋來代有顯者至君高祖彥良曾祖斗瞻祖佶皆隱以終父祿字履翁號石田以儒醫名累贈吏部員外郎母張氏累封太宜人君舉浙省成化丙午經魁明年丁未登進士除知崑山縣以石田憂去弘治甲寅起復知山西之高平二年調常熟又二年考最進階文林郎受贈封典尋

以風憲召補考功主事正德丙寅轉驗封員外郎以詔  
加贈封之恩尋陞郎中又四年遷湖廣右叅議尋轉福  
建提學按察副使一年轉河南右叅政尋進右布政使  
是歲以湖廣郴桂功受白金文綺之賜尋轉今官以卒  
歷中外若干年年五十六君生有異質志高而銳於學  
初入邑庠都御史白洲李公以按察副使提學兩浙見  
君諸生中曰天下士也既而高第主司猶以未首薦爲  
嫌在崑山常熟延禮文儒討論羣籍以資博洽高平則

專以經義教諸生旁及隣邑在吏部時嘗倡爲五經會  
非甚病雖冗不輟披覽同考會試以得士稱提學尤稱  
精鑒所著凡若干卷其篤學如此每談治體自六部達  
諸鎮能歷道其故及當變通之宜北敵犯邊嘗陳邊務  
數十事馬鈞陽劉華容二公皆重嘆許其才略如此弘  
治末多所建白至孝廟山陵方起君聞有水石爲病上  
疏言之至下君詔獄執不變未幾還君於職君子謂君  
言於君無隱情而山陵之議大矣君旣葬石田公廬墓

陽嘉山中至功衰猶戚事張太宜人不有私篋其忠孝  
大節如此君歷三縣因時立政畫然歸於禮法極力乃  
已毀諸淫祠而以其材充廟學公署之用常熟稅入常  
後期君令先輸者無耗計日遞加旣乃以多益寡耗足  
轉輸而民無敢後者東南諸水由常熟白茅塘入海工  
侍淳安徐公嘗合四郡力疏之會有漲沙當海口潮汐  
增淤水患如故君相許浦塘便率民開之比歲衝流日  
深水不爲患汴城苦遠汲君井城中數十處皆得美泉

又作屋以居織染貧匠其惠利如此君爲考功郎中逆瑾勢方熾君惟共職不敢以媚會有擬薦某爲某官某爲某官而擬君翰林者君聞之亟爲書辭於內閣事爲之寢當是時辭難處辭尤難識者以是韙君其自守如此初至湖廣分守辰常道會郴桂賊起遂請改道自效冒暑提兵追賊平之在福建以進表至京師會轉河南時方以郴桂積勞成疾而東賊方渡河天又寒甚有勸緩行者君亟輿而往卽至嵩縣居守賊方走湖廣君曰

賊逼土兵必復向汝州洛陽藩籬備不可缺乃自嵩馳赴之賊至君輟食登城晝夜調度手書示城中人曰不上城及上而輒下者皆斬既有將下從賊者即斬以徇城守益堅賊遂引去其臨事應遽如此山陵之獄以救君為言者兩京科道及庶吉士進士凡若干人君性介直濟以和易與人交能以量容以情恕不能以詞色假故人於君無喜怒而有感愧其意氣傾動如此性惡華侈位至方伯服食如諸生時有餽貽於故舊儀而不



貨其儉約如此吾嘗論君學政兼資惟古之師氣以輔志久而益篤使遂大用當有以副人望者惜也階已及而命沮之然其所建立亦足暴於天下矣君三娶初沈氏累贈宜人生子某女嫁某繼邵氏封孺人贈宜人生子某女嫁某繼應氏孫男一世憲女一君墓在某縣某原其葬在卒之明年某月某日銘曰烏乎名父乃躬自厚曰古之人人則謂何三代斯民古亦有言任重道遠中行尚矣孰我狂狷君歷內外邑省藩臺生無遺力死

有餘才終焉道路吁其可哀惟才之難匪今自古我作  
銘詞烏乎名父

明故鎮國將軍浙江都指揮同知白君墓誌銘

君姓白氏諱宏字宗大別號松庵其先出元部落有巴  
爾斯台者以功受王封國初有士頌者始受籍民於永平  
之昌黎君曾祖也君祖誠從文皇靖難之師有功後再  
以克敵功累陞永平衛指揮使君父廷玉襲嘗推總三  
千營事今俱贈如君官母蘓氏封太夫人初蘓氏娠君

有夢祥旣而君生器宇果異六歲讀書日記數百言與羣兒嬉有一誤墮溝中衆駭奔去公獨垂繩援焉十三能屬文選補武學生從翰林劉先生戩受易學三應科舉更習書經司馬余公子俊保國朱公永臨試弓馬策略屢優獎之時京營候叅帥者若干人君為之首弘治戊申始開武舉君舉第二陞署都指揮同知贊畫方略於大總兵所加俸三石未幾實授癸丑冬有舉君久諳戎務者以前官總理神機營事司馬馬公文升一見稱

材且以久滯為惜尋銓今官理軍政兼屯田清軍馬政  
諸務庚申歲總漕都憲張公敷華以君廉勇協望舉總  
浙漕君疏八事上備朝議多見施行居二年鎮巡會推  
邊帥疏上君名奉勅總督海道今都憲洪公遠時以憲  
副與君同事葺城於圯浚壕於淤抑強警惰以御守卒  
先是有屋於海島者往往招釁而私鹽竈燒疑於烽火  
君悉去之他所施罷皆當利弊又以餘力設師塾以訓  
武胄居歲餘海道寧肅正德改元以上登極恩使來致

白金及金獅緋衣之賜明年兵部以荆楚地重乃移君掌湖廣都司事君鎮以簡靜南人懷之巡按御史李君天賦嘗以堪大將舉是歲三法司奉勅蒞獄於藩有議死而稱冤者君得其情正色言之不少畏却蓋得釋者二百餘人又明年君以疾請於巡撫都御史陳公鎬乃檄還君於浙越三年江西盜侵衢州鎮巡謂公練達委以疆事君極力備禦未幾輿疾還卒是為癸酉六月四日享年六十有五配韓氏封夫人五軍營總領都指揮瑛之

女男一人曰文杭州右衛指揮同知女一人孫男一人女二人  
君雅好吟咏與客倡和動成卷帙有松庵集藏於家予在  
浙及湖再與君同官蓋知君久茲其子文以叅政鄒君某狀  
來請銘尚寶卿劉君克柔復書為申之君墓錢塘下竺桂峰  
之陽其墓在卒之明年某月某日銘曰有美白君用夏以繼用  
武以承而文焉以濟是謂功名之際才觀於漕政觀於海君歸  
自南寮遷歲改我銘於何輿言是采嗟我懷君申之以慨  
明故太平府同知進階朝列大夫屠君暨配陸

宜人墓誌銘

正德甲戌二月一日太平府同知平湖屠君以疾卒於家先是歲癸酉十有一月十有九日其配陸宜人卒其冢子江西布政司叅議奎季子南京某道監察御史珪先後奔歸自官適及君病且喪越某月某甲子葬君於某山之原而宜人合焉禮也御史珪以叅議奎書來請銘江西憲副沈君剛夫實為之狀御史先官吾郡簡召入某道以君及宜人老疏請便養改令官予時與聞之

今二老繼沒而銘焉是屬其焉能辭君諱熙字元明號  
三一居士世居嘉興海鹽縣西莊里今其地析隸平湖  
其遠祖有舉解元者曰曾一至君曾祖澤民蓋數世矣  
祖湘以君從弟太子太保刑部尚書公某貴累贈資政  
大夫刑部尚書父楨號西谿以君貴贈文林郎武昌府  
推官母龐氏封太孺人君生而敦敏九歲游縣學十五  
以書經補學生既而習禮經時陳郎中清陳僉事謨諸  
知府觀以經學聞西谿公延以師君君學能自得三君



者大期之都御史澤州楊公繼宗時為嘉興剛直少許  
可或問士必先舉君君喪西溪公哀而得禮事龐太孺  
人謹龐始就君兄養君晨省必躬有美飲食必饋成化  
甲午君發解浙省少傅木齋謝公時為解首實知君深  
君累屈禮部公嘆遺才焉初選得武昌推官武昌會府  
事劇君敏而勤居數月獄無滯囚有盜繫十八年弗決  
者中一人年三十一人年二十九君曰信如是二人  
為盜時尚在童稚豈以弱自誣伏乎即辨出之興國民

吳榮謀殺徽商張姓者久未成獄君廉得榮焚屍藏陶  
穴中竟致於法其他理淹察隱者多類是都御史林公  
俊時為按察使尤雅重君君當考績林公曰君子之心  
公而恕屠某不有是耶考以是書巡撫都御史沈公暉  
巡按御史曾君昂王君恩輩各疏君治狀請旌異勅進  
君階及封贈父母妻如制尋擢建昌同知於是藩府貴  
近有陰籍富民抑配子錢將取其產者民不敢言時知  
府入覲君諭而裁之歲旱苗稿君禱輒雨凡三禱三雨

未幾以母喪歸服闋改直隸太平府治如建昌周方伯  
紹立時為守以得賢佐自慶巡撫都御史艾公璞巡按  
御史陳君世良以公勤獎之居無何君以久宦自厭遂  
疏請老吏部稽叙賢勞用恬退例為之請詔進從四品  
階蓋家居者凡若干年君性介直而惡惡恒過故於衆  
寡合歷官所至惟一蒼頭自隨廨宇蕭然人弗堪其約  
而君固自安也君歸未幾太保公亦得請致仕二第相  
去一舍所恒放舟相過召諸昆季為雅燕友恭之薦鄉

人談之府縣非公事不至或以私請輒加叱絕二子繼  
登甲科君每貽書申以官戒其於家稍治田疇取自足  
而已其晚節如此宜人亦邑鉅族曾祖叔某祖謙例授  
承事郎父鴻號怡菊以詩禮稱廣德知州鳳其伯父也  
母唐氏宜人詳慧淑慎通孝經列女傳諸書能誦古文  
長篇女工織紵精粗兼勤怡菊翁擇配歸君為西溪翁  
冢婦時贈尚書竹軒公總家政與西溪翁皆重之初君  
以禮數學杭紹間及入太學積數歲不歸宜人躬理家

事尤急子之教養龐太孺人得婦道甚君官武昌欲迎  
焉宜人曰姑老矣吾任其養江路險遠迎惡乎宜太孺  
人卒宜人太慟幾絕歛殯具物比君歸無遺憾及佐襄  
事無違始以君武昌旌例封孺人及叅議考工部績當  
封例從君官再進今號君卒距其生某年某月某日壽  
若干宜人卒距其生某年某月某日壽六十九子男三  
長即奎其科進士娶沈氏繼倪氏女五長壻馮鏜次馬  
鍾次王金次嘉邑諸生楊伯雍次太學生張鏐孫男四

永錫鈇鈇鈇女一銘曰兩官三郡自老以歸詔進厥階  
燧如金緋有子於省有子於臺維政有聞於時稱才才  
以自効人曰公教賀者方來乃繼以弔婉婉宜人厥德  
同之繼卒偕葬其終與從之

明故光祿寺署丞進階文林郎華君墓誌銘

光祿華君之病而將卒也命其子鉦徵銘於予越九月  
鉦以太僕少卿呂君仲仁狀介吾姻友秦君國英以君  
言來請昔君在光祿見內庭供億之繁而有司者弗能

繼也有隱憂焉每見予部署輒形於言今君已矣銘焉  
能無感乎君諱珵字汝德別號夢萱華其氏也華自春  
秋來為著姓晉有孝子旌於南齊者曰寶錫諸華實宗  
之在宋有族望曰原泉者傳八世至伯初君高祖也是  
為錫隆亭之宗伯初子彥威彥威子惟正咸以隱終至  
君父時濟翁始應助賑例授宣義郎後以君暨其弟南  
京吏部郎中珏貴先贈如君官尋加贈戶部主事母徐  
氏累贈安人君幼有鉅人儀度讀書早悟而能勤甫成

童與吏部同學時其族弟湖廣叅議仁甫亦在館更切  
廁以業君游邑庠廩於公者若干年文學日進凡七試  
應天始以貢升太學於是二弟者後先登第君弗愠弗  
沮益友天下士士之負時望者極意結納有多聞之益  
既而選於吏部授光祿寺大官署署丞光祿劇地而大  
官為最中貴人宣索日數至聲張勢附殊難酬應獨見  
君正色溫言顧加體貌君夙夜恪居三載考稱受勅推  
贈如制尋以勞邁疾得告南歸時弘治己未也越若干



年病已倒起君不行乃用詔進階致仕君始家居事親以承歡為說親有疾必躬進藥繼以躬禱喪葬祭皆勉自躬壯歲以父命自隆亭居闕莊闕莊業未治或為君少之君曰分也數年而田野益闢食指至千餘則規而率之日脩禮於祠堂退而事事內外小大無敢喧闕自族姻黨里至於疏逖皆被其惠君時未有子擇諸從得吏部季子鉦鉦已聘夏遂子而室之君平生好品論古圖書器玩以賞鑒自負或持至君所真贋立辨所御几

杖盤盂之類皆倣諸古居官時公退輒自玩及歸而益  
遂焉更自號曰尚古君既有樓閣園亭之勝而古物充  
貯其間所過賓客又多清人逸士君古衣冠從容日夕  
城府俗事不惟不屑亦不暇論者謂尚古之號於是為  
稱君老多疾日焚香靜坐間以製藥治書自適樂非嘗  
驗不製中須遠方珍品雖重賈必致之故病人有不之  
醫肆而之君者書倣宋人活字板加以精密愛放翁諸  
集多印以歸士夫士夫以他書鈔本至不數日以印本

出尤以是稱快其手校而梓行者若揚子方言百川學  
海東書堂帖又凡數十種歲衣寒者食餓者殮葬死無  
歸者不下若干人正旦扶携來拜稱謝者盈庭君無德  
色庶子鑄晚生年及就傳君以教屬鉦曰吾老矣汝尚  
終之先卒之數月嘗泛舟西觀於大江登金山絕頂東  
望海嶼有超世之想焉歸而疾病病間為二子處後事  
甚悉蓋三越月而君卒矣君雅能忍或負君君率弗校  
晚有構大禍以誣君者負君為尤衆皆危君君曰命也

吾焉咎之未幾誣者自敗坐遠戍戍還詣君謝君勞苦  
之如平生蓋君之閱世於是久矣論者多之君卒於正  
德甲戌正月十有六日距其生正統戊午某月某日壽  
七十有七配胡氏贈孺人繼張氏封如之子男二人鉦  
為長太學生其次即鑄其所生母葛氏女四長庶出適  
錢詔次適陳鳳徐某周某俱側室陳出孫男五女一君  
葬於闕莊新阡蓋去所居二里而近胡孺人先葬某原  
鉦嘗請遷祔君曰非古也且體魄安矣其勿輕動鉦從

之葬之日為卒之明年正月庚申銘曰華君好古詩書  
是珍謂其人遠茲惟其神有官卿屬厥亦有祿有感於  
衷不敢上告敢憂於獨謂彼躊躇退我巖谷有林叢叢  
有泉淥淥有子克述既傳而終我思古人九原其從

明故徵仕郎工科右給事中葛君墓誌銘

正德丁卯春廷臣同日以勅致仕者三十七人工科右  
給事中吾錫葛君嵩與焉君子愛而不唁君歸四年庚  
午究瑾既誅有疏起君者又三年癸酉君卒君子有遺

望焉先是君之子泰死君哭之慟既力疾治葬已乃用書謀於其從子刑部主事恒以其弟豫為後至是豫將葬君以君治命奉刑部狀及書來以銘請余與君同門既而同朝相知蓋嘗嘉其節概有可書者銘能無諾乎君諱嵩字鍾甫葛其氏支庵其所自號世為錫人曾祖仲良祖文晟父浩由太學生歷知興國永寧二縣終湖廣按察司經歷以君貴贈文林郎禮科給事中母沈氏贈孺人繼母田氏封太孺人君幼聰慧好學成童從故

學諭高庵俞先生受尚書為經義成章可觀長老見而稱焉君曰某未讀書何敢言文蓋閉戶誦習者三年同進讓之十九補郡學生提學御史戴婁二先生皆加器重凡七試至成化丙午始領鄉薦又五試禮部登弘治己未進士庚申授行人有事周遼二藩禮成加敏嘗再疏言事擢禮科給事中先皇帝在位勵精求言君既就列即感激論事應天尹某不共於職君劾罷之魏國家衆訟田於民事久且濫君請專官往覈是歲當閱實邊

儲君之薊州諸倉多所釐革還上四事曰謹收納曰禁饋送曰抑權貴曰清屯種皆切務也未幾命點團營軍士於是貨免於私役者衆伍恒半虛其弊蓋久而莫敢昌言之者君倡同事以狀聞兵部尚書華容劉公方圖覈正得君奏重為稱歎三載考最勅贈封父母妻如制未幾遷工科右給事中上初改元君上法祖任相納諫務學四事是冬南京科道官以言事逮至君偕同官論救甚力既而諸大臣進諫科道繼之蓋忤瑾者以是君



既致仕歸作三宜亭於後圃日手一卷燕坐其中客至則出然惟詩人徵和經生質疑則喜應之或問國事不答問郡邑事不答及廷議起廢巡按御史上君名日且有超擢有勸行者君曰吾言不利於奸得退為幸行焉用之雖然命下而辭則無及也乃手為請老疏緘寓刑部曰即有命當以是上未幾病瘡且瘡數月而殆是為癸酉四月二十四日距其生正統戊辰十二月乙丑為壽六十有六配孺人郁氏子男一人即泰邑庠生女一

人適江陰杜恂孫女二人長適江陰徐毅夫次受同邑  
施巽聘豫有女一人受武進黃氏聘君性謹飭瞿瞿蹈  
履於流俗中多所自茲待人無少長皆厚以周或不答  
不校也居父母喪哀而得禮事繼母如母與弟大梁居  
無間言教其弟之子如子恒舉進士今在刑部有官譽  
自謂得君教為多兄亡姊寡撫其子各置之所所著詩  
文有筠軒錄君墓在龍山嶧嶢之原其葬之日為卒之  
明年甲戌十一月二十六日豫邑庠生銘曰官有言路

人有諫姿官哉人哉茲惟其時彼為厲階戾我鑿枘人  
哉官哉往蹇來遂祿不可榮乃榮其退人壽幾何言則  
不朽視物考年孰與君久斯麓斯干君墓斯安過者式  
觀曰惟其人不惟其官

明故中順大夫建昌府知府蘓君墓誌銘

正德甲戌春三月辛卯建昌府知府蘓君介福以疾卒  
於官其冢子承芳吾常郡守李侯惟岳長女壻也以其  
年秋九月奉君喪歸道京口用書告侯請銘於予予嘗

聞君於君之姻御史中丞王公朝言先是五年君以監察御史奉勅總督江南糧儲予歸自漕臺一再見君越三年君得郡南來訪予病中別未久而訃至何忍言銘然侯之意不可虛也按侯所為狀君諱錫蘓其氏介福其字別號槐軒世為山東濱州人曾大父某大父某皆以隱終父瑁膺貢入太學授獲嘉縣學訓導以君貴封監察御史母鄭氏封孺人君幼穎敏甫十歲見古人詩詞豪壯者一二讀輒成誦對客歌之有激昂振迅之意

既而侍監察公於獲嘉時吳御史天宏為邑每課試諸生必召君偕見君所作嘆賞不置成化丙午君與其兄銓歸補州學生銓有疾君日夕侍湯藥以進伺意所嚮而寬慰之疾且殆致書獲嘉猶為婉詞曰不如是則重親驚銓沒君哀痛幾絕具物成歛於是嫂田氏少二孤方襁褓君撫之慈田忘其寡焉居數年監察公休官家居謂銓既夭尤以高門屬君君求靜地卒業居宿於州東秦臺者若干年弘治乙卯以書經領鄉薦己未登進

士第授直隸太湖知縣太湖政積弛君初至振以嚴肅  
碁而濟以裕再碁而濟以寬其自勵清勤始卒不變居  
四年巡按上君治狀召拜山西道監察御史奉命按視  
山海等邊關倉儲廐馬稽閱惟謹蓋所至著風裁焉正  
德己巳有議革巡撫官者於是君方以才力稱於臺乃  
有江南之命蓋其權實視巡撫君毅然當之惟民惟國  
不顧權勢厥既巡行蘓松諸郡見其賦繁而弊滋也乃  
立調區之法嚴加耗之令宿奸震懾人困稍蘇或以弊

告君曰矯枉必過直吾嘗聞諸古人凡吾所舉蓋以濟時也他日將不更有濟之者乎聞者說服未幾以母憂歸既終喪復任擢知建昌府君素著剛明聲民望而畏之君曰守令同體建昌之民即太湖之民也至郡詢諸民曰利施之曰害罷之不疑不沮事用和輯郡中民居櫛比先是屢火君求古人火政為備甚悉其他備預事多類是撫巡藩臬稱良守焉在官九閱月而病又三月卒年四十六配譚氏封孺人子男五人長承芳次承學

皆州學生次承訓承志承恩女二長適王恩溥次許聘  
王同量君喪至濱以明年乙亥六月某日葬於某山之  
原從監察公兆銘曰民有師帥國有紀綱或志其事而  
地焉未當當焉而兼其氣孔揚匪力則裕政焉用成烏  
乎蘓君以令以守以撫以巡中外閱歷允為才臣地以  
成志非君而疇其人胡不永年烏乎蘓君

明故承事郎鄒君墓誌銘

君姓鄒氏諱祝字永章別號松石宋忠公浩九世後有



號南山而鄉稱先生者又若干世有諱暉者號友竹於君為祖君父曰濂號凝碧母華氏南齊孝子寶之裔友竹翁嘗七刲股以愈母疾事見王文靖公某所為傳故君家世稱孝友君生而豐偉有器量甫弱冠凝碧翁以家事付之遂納交於錫於吳中諸先生長者請聞禮義之方歸以飭於家政諸先生長者皆樂與之君性好樹藝故有腴地方數十里君以堤以塹以瀦以溝松杉桑梓菱芡茭蘩蒔植隨地罔有間隙見者謂有古井田遺

意雅愛奇石與松中庭並植焉沈石田氏見之謂曰此  
如其人為圖與詩贈之繼而徵賦於雲間錢文通張東  
海長洲吳文定暨武進陸宮詹諸公凡得詩若干首故  
人稱松石君君故居沈瀆之南塘今徙蠡溪人以君故  
稱蠡溪為南塘君事父母孝其喪葬雖細故必檢朱子  
家禮而後從事歲時祠及墓祭饋奠畢繼以流涕忠公  
墓在武進百里外天順間巡按御史暨郡守繼修之君  
皆佐以財力曰此固為後者事也矧有官令敢不是共

先世圖書器物或遺落於人雖重價必求復焉曰是忍  
棄之將無不忍者鄒族既蕃有年甚少而為君父祖行  
者君執禮必謹家自叔祖母吳以下守節者數人而華  
氏惠氏未及旌而死君嘆曰是有國制既不可追矣不  
有文章可以圖不朽乎乃請於文定吳公以下諸名能  
文者各為立傳謂之四貞一烈與配華居嚴而有禮嘗  
得子而夭君年四十三子炫始生華子之君勞以成愛  
深得教法外氏中衰君既養舅姑終其身復為封樹以

葬內弟伯仲繼亡遺女四人少曰於我育及長曰於我  
嫁嫁皆得其人其最得者為都運張君元之其惠於鄉  
貧者病者死者皆被之又嘗取古孝者二十四人贊并  
五倫箴刊授蒙士俾之誦習兩承勸分令出粟如數而  
辭不受服年逾六十復值有令乃受承事之命有司以  
為賢歲鄉飲用書請焉卒辭不赴君忠厚謙遜而勤終  
其身手鈔名人詩文雖隆冬不輟其先世及君所自得  
者刻而藏焉各若干卷化及童僕亦知退讓近數十里

遇諸塗而却立致恭者必君家人也晚謝家事始就逸  
暇所居西為蓉溪東為蠡溪各選勝為亭館時與賓客  
遊之有懷故舊無遠近必貽問焉其中服履烏不以時  
易製當其老也時製復如其少君曰吾固謂當爾其有  
恒如此君卒正德九年七月九日距其生宣德壬子九  
月五日壽八十有三配華氏母同族也子男一即炫太  
學生孫男三俱夭女五長受華某聘其二蔡某其四華  
某其季王某君墓鳳凰浜之新阡以卒之年某月某日

葬先期炫奉都運君狀來請銘銘曰古有本富曰惟力  
田廸乃孝弟漢科是先偉焉南山出道鄉族後二百年  
君繼其躅東陌西塘有蒲有桑或入君里如古井疆惟  
君有子出友國士慶澤方將孰謂君死

陸光遠妻成氏墓誌銘

近世士庶人之妻之卒多以孺人稱於銘誌而江之南  
尤盛國典命婦封號自一品夫人至孺人凡七稱孺人  
者蓋取初命之虛名以崇死者然潛矣知禮者耻之光

遠之世自其始祖宋朝散大夫常為無錫徐陶望族成  
化間夔州府同知源潔者光遠父也以鄉貢起家綽有  
宦績光遠蓋知禮者故稱其妻不曰孺人曰成氏禮  
也按狀成諱妙清其族出武進稱夾山成氏祖程父諫  
母馮氏年十七歸光遠逮事其太姑及繼姑既有娣  
有子婦皆宜之夔州君之之官也以蜀道險不以家從  
太姑亦與留焉成相光遠以養如夔州之在侍也久之  
聞夔州疾謂光遠曰盍亟行視乎緩將遺恨焉光遠遂

行比至數日夔州卒光遠以喪歸成相襄事夔州有遺  
貲光遠當受分成諷之讓叔氏於是始有產平生儉勤  
出於天性日鷄鳴起即事紡績及布帛成衣履鬻精以  
為常衣至數澣猶御器非敝不可御弗棄也推其志即  
一錢且重費之或謂之吝不辭至於周貧恤喪教子燕  
客雖偶乏必勉而共比疾劇呼其子婦若孫訓如其素  
卒為正德癸酉十二月二日距其生正統戊辰四月十  
日年六十有六子男二長萬安配王氏為廣州府通判



懋之孫萬全配張氏為福建運使元之之姪孫男三九州聘李艘女九江聘胡宏女九川聘鄉進士吳鏐女孫女一聘于封戶部主事成天章子壕光遠卜丙子某月某日以萬安等葬成於某山之陽光遠善姑布子卿之術嘗以形論心於予為相知先葬請銘曰吾妻不足以辱子吾先世多銘於名公卿文在譜者凡若干篇銘吾妻吾將藉不朽焉予讀錢常山憲狀遂序而銘之常山其妹之子也銘曰夾山之成徐陶之陸耦嘉維族亦維

德之淑既蕃乃育森其蘭玉乃偕老違夙夫命則然其  
疇曰不祿

徐母楊氏墓誌銘

徐母楊氏前鄉貢進士直夫之配也其二子治洽皆太  
學生楊教之得母道故以母稱楊無錫望族都憲公叔  
璣以文與政望天下母其孫女也其父為太學生士書  
娶於王而生母年若干歸直夫直夫江陰梧塍望族名  
經其父為中書舍人惟正君之子尚賢成化庚子舉應

天鄉試第三直夫世其文母之始歸也尚賢君已沒而直夫方勤於學家衆至數千指姑薛總內外政母日惟饋祀是勤侍者曰日有某事聞諸乎母曰有姑在吾何敢聞姑之與聞也亦以子學故非得已也我於何有直夫劬於書則慰之少怠又勤之弘治乙卯直夫舉於鄉為之喜焉勸之進學明年丙辰會試下第為之慰焉勸之進學及己未罹變為之唁焉勸之進德於是姑薛沒矣母相直夫襄事於禮直夫遘疾卒母哭泣以毀家政

將及焉或以故事告母謝不能惟以成畫授紀綱之僕而內外肅如也而家業日裕於是二子皆就傅矣母有戒言必稱直夫稍長俾游邑庠會有例入監並登焉或曰少未可母曰吾聞太學萃天下士師焉友焉皆於是乎在雖少可不力乎初徐氏自尚賢之叔荆門知州君泰舉順天鄉試第一而羣從日趨於文既而尚賢父子繼舉而夭於科第有缺望焉母出宦族謂士不成名不啻農失田工商失藝與皆是以若是勤也母蓋婦人之

知義者正德甲戌十一月十一日以疾卒距其生成化  
癸巳十一月八日年四十二子男三長即治娶武進段  
氏次即洽娶無錫華氏次沾聘同邑夏氏女二長適趙  
鏊次受夏文敬子某聘治與其弟洽等卜卒之又明年  
十一月二十五日葬母於砂山之麓合直夫兆先期以  
江西叅議高君舜穆狀來請銘予與尚賢君同鄉舉故  
直夫父執予今見治洽如見其祖與父也於是乎銘銘  
曰閨中人兮貞如玉羞饋祀兮共以穆事良人兮不終

身未死兮心從心從兮奈何井寒泉兮無波子成兮乃  
死死不媿兮夫子

趙梁伯妻錢氏墓誌銘

正德乙亥四月二十有四日鎮江衛指揮同知趙君梁  
伯妻錢氏以疾卒明年丙子十有二月二十有六日梁  
伯以其喪葬諸嵩山祖塋之次鄉葬之數日持喻主事  
宜之狀介薛襄甫來請銘梁伯過甥也其母於吾母太  
淑人為再從姊予知其家之故為詳喻狀出梁伯言不

誣其妻乃叙而銘之錢氏諱貞字貞李其族居湖頭於  
無錫為望國初徙圓通然號於人猶曰湖頭惟實者圓  
通之望也娶於華而生貞李其行在四長歸梁伯梁伯  
名枬其宗出宋盛國公叔黔其族望蓋與錢埒初貞李  
入門逮事舅廣洋翁姑過氏稱得婦道凡若干年舅卒  
又若干年姑卒貞李喪之皆如禮於是惟實翁卒母華  
寡而貧貞李曰盍於我養謀諸梁伯梁伯從之及卒曰  
盍於我葬謀諸梁伯梁伯從之其兄有孤女擇壻以歸

梁伯入貲助賑得今街里媪或賀貞李貞李曰何故曰  
婦以夫貴曷為不賀貞李曰貴不期驕吾是之懼胡賀  
之敢當哉既乃勸梁伯益持謙共加之勤儉梁伯罹訟  
客於外貞李攝家事者十餘年而田無蕪穢僮僕肅如  
也惠施於姻戚隣里君子謂貞李有士之德既子燿天  
家且多故梁伯以為憂貞李曰賦時厥共則無公責產  
平厥償則無私怨梁伯方嘉納焉而貞李卒矣貞李生  
天順壬午十有一月十有三日享春秋五十有四子男



一人即燿邑庠生娶江陰周氏女三人長適郡庠生錢世爵次受華某聘次受顧某聘孫男三坤聘常熟錢氏圻未聘璽聘同邑殷氏孫女一銘曰家有中衰婦無外事維志之貞乃罔終墜人亦有言懷安敗名我告夫子永觀厥成家復於故我脩吾婦我母我姑厥有恒度有年弗延有子弗年我銘以傳貞季氏錢

方母太安人朱氏墓誌銘

太安人朱氏今南京刑部福建司郎中鵬浙江道監察

御史鳳之母也其配為贈禮部主事節庵府君諱麟字  
某禮部卒時母年已七十矣於是鵬在禮部鳳為行人  
將有臺擢皆以母老乞便養為今官南京遂奉母以居  
母體康志適起居甚度見者稱壽居一年得脾疾少間  
思家復奉以歸又一年疾病卒卒之明年正德丙子二  
月二十有六日鵬等奉以葬合禮部兆頃自為狀介成  
主事汝從來請銘按狀母諱清蘇之長洲人其父曰德  
明母某氏初母無昆弟父母將擇壻贅焉久之得禮部

禮部崑山人也其父槐庭翁方以學行稱而禮部又英敏可任事是以與於擇厥既就館母日侍父母月問舅姑實兼內外之養禮部方從事於仕以例授某州吏目尋致其事與母歸依槐庭翁母年纔三十亟屏諸飾相禮部力田治生躬井臼以饑夜事麻枲無間寒暑家於是乎始樹及子稍長當教母謀諸禮部謂某盍師焉某盍友焉用嚴勝慈不掩小過禮部嘗謂母曰鵬吾使入官鳳吾使處家鵬治經鳳不必治經母曰何哉君所謂

經者經以明理家何異於官而可不以理為也鳳既通經而後治家何不可之有禮部矍然從之命鵬以經授鳳受習唯謹既而皆知名弘治戊午辛酉繼領鄉薦於應天正德戊辰同得甲榜人謂方翁知家方母知子母在家有外姻請見雖甚戚必審乃出凡飲食必祝人謂母有女德平居恭慎靜密思而後言慮而後動人謂母有士行方二子偕計而北卒業而南或以勞為母慰母曰分也不以是戚及並位於朝出入臺省或以榮為母

賀母曰分也不以是忻母當禮部喪蓋衰服三年未嘗去身鵬以盛暑請少釋母泣曰吾亦知無益死者但盡吾心耳時以覃恩封今號僉謂命下不可久虛請具嘉服以拜母泣曰吾忍乎哉吾何急焉而輒釋此也他日母欲從俗以僧道送禮部葬鵬以禮告諸姑姊解之母曰兒處我以禮不從何為其從善如此母卒正德丙子六月三日距其生正統壬戌二月十日壽七十有五子男二長即鵬娶高氏封安人次即鳳娶范氏女二適張

珮龔天禎孫男二策龔俱太學生策娶周氏鄉貢進士  
在之女龔娶黃氏京衛經歷京之女女四長適庠生梁  
金泉州府同知紉之孫次適庠生王同祖石門縣教諭  
曰仁之孫次適太學生朱希顏沂州判官彬之子次適  
陸九鼎鄉貢進士表之子曾孫男二曰田曰井井聘朱  
氏蘓州衛指揮僉事質之孫女女四長許嫁葉廷植文  
莊公曾孫也餘尚幼墓在邑馬鞍山馬路口之原銘曰  
始館以義卒嬪以禮子教必經如弗獲已伯出仲處母

心則然聯登並顯吾敢要天釋服拜嘉雖暫不可葬故從違有子無我稱母以銘斯其稱情後有傳者於是乎徵

徐永州妻吳孺人墓誌銘

孺人吳氏無錫新塘人大父諒父約皆鄉望母胡氏孺人生及笄歸永州永州名鼎字惟器江陰梧棲徐氏之望景高翁長子也孺人歸未幾翁卒獨事姑包氏凡姑命承之唯謹翁既葬諸子分異永州獨以翁命補諸生

邑庠孺人乃勸永州擇城中僻地為館延師而學焉孺人代理庶務小則遂大則咨皆有條叙永州舉於鄉於是三子者長皆授之經延師益選而厚越數年子圭宏道同鄉舉越數年子愷援例入監永州屢屈禮部就選得推官永州孺人居家率諸子事事唯謹越二年孺人以姑老用書速永州歸養永州曰吾志也而吾妻能先之所以相吾者於是大矣歸八年姑卒又八年孺人疾又五年卒是為正德丙子十二月某日距其生某年某



月某日壽七十一子三人長即圭娶斥岸蔣氏蚤世次  
即愷娶傘墩陳氏繼無錫楊氏次即宏道娶石橋趙氏  
女一人適縣學生王輅孫男六人中孚娶石橋趙氏鑰  
聘黃墅夏氏鑄聘古塘王氏夢熊聘同邑湯氏浙江右  
布政使新之之孫也夢熊夢麟幼未聘孫女七人一適  
國子生同邑趙鈴一適武進學生楊鈞一適無錫吳汝  
思一適中書舍人常熟李而遇宗伯石城公子也一適  
武進學生鄭軒一許聘同邑夏勲孺人既卒之明年丁

丑十二月十九日永州以子愷等葬纓市東之新阡永州醇謹有士行予故知也狀來乞銘銘曰敢知家而不敢與知官家知內而不敢與知外曾謂若人而不如鴉我思古人不敢階厲茲惟其藏兮無使樵若牧也壞

戶部員外郎陳公配過安人墓誌銘

安人過氏戶部員外郎惺泉陳公配也後公若干年卒卒之明年正德丁丑某月某日其子表葬焉先期自為狀介莫如山請銘某與如山皆公門人也如山言如狀

狀於某亦奚以為過為吾母太淑人之族其先淮之和陽人宋徐王郡馬孟玉自汴都來居世稱黃藻岸過氏安人祖曰懷玉父曰永母錢氏安人生若干年歸公於是舅裕軒早世姑錢亦弗及侍侍祖舅耕樂翁及祖姑姚起居食飲得扶衰之道公為諸生凡若干年始舉於鄉連捷會試遇疾歸越三年登進士第歷官戶部主事員外郎凡十年安人皆從之居約克儉稍裕進以禮凡寓館必謹內外於舟於輿皆然居京邸鷄鳴戒朝午饋

饌惟謹公考最安人封今號於是公再考陞員外郎叅  
閱章奏會浙江多逋尚書請命有幹局屬官一人督之  
遂以屬公公道得疾比歸疾甚安人率諸子露香夜禱  
甚懇數月公卒安人慟且病病已以諸子葬葬已力教  
如公在時公弟某先卒遺子若女無所依安人為婚嫁  
之或嘆其難安人曰此君子意也吾方媿弗克稱何難  
之敢任一僮為商船觸死有司者將論以故殺商人懼  
願以百金為請安人辭焉曰僮死實誤故論過矣言於

有司釋之其知義如此安人卒以正德丙子二月十五日壽七十有四子男三人長即表娶賈氏次言娶茹氏次文娶徐氏言文俱早世二婦繼之女四人長適武進張廷玠次適宜興徐文靖公從子元杖次適同邑張都運企齋子塘次適太學生江陰徐紳孫男三仁庠生娶武進莊氏義娶江陰徐氏孝亦庠生聘武進白氏康敏公族孫也孫女一許嫁太學生江陰張某曾孫男一才良女一墓在邑西惠山聽松庵之右合公兆公諱及字

及卒葬年月具前志茲不書銘曰族之貴兮宋戚里受  
命服兮從夫子壯且老兮稱有禮于嗟若人士兮士兮  
明故劉母張氏墓誌銘


正德乙亥八月十有八日丞無錫縣劉繼仁之母張氏  
以疾卒於官舍先是歲二月繼仁督民輸京師其妻董  
與其子秉公侍母以居比母卒貧弗克殮令君侯世卿  
助以俸錢若干乃克殮越二月繼仁還至淮始聞報哀  
慟隕越奔歸即次將以明年丙子正月舟其喪以歸乃

介吾姻前涿守之子張元玉來請銘侯君為之狀初繼  
仁考選得山東蒲臺知縣居一年疏論鎮守官奸利事  
被逮下詔獄既而事直猶左遷今官繼仁簡質君子也  
嘗言某在獄母憂而不怨及出喜而無沮予聞而賢之  
乃迎養未幾而遂不祿以死侯君悲之予亦悲之按張  
氏涿州胡寧里人年若干歸繼仁父府君鑑為繼室繼  
仁府君元配張氏出也時甫四歲母時其食衣無寒無  
饑與母在等八歲就外傳朝送之門暮望之閭十八入

州學資之加勤凡若干年至弘治辛酉繼仁舉順天鄉貢尋遭父喪喪畢卒業太學旬月供饋弗須而備皆自母紡績以出又八年正德壬申之官蒲臺於是流賊方擾山東母留於家分俸為養及遷無錫便道省母母命亟行乃泣請奉以來甫至二月上官以蒲臺聲交檄委重什八在外母解居疏食菜羹不知肉味論者謂侯君以方嚴為政繼仁稱其佐張母繼仁亦惟稱哉母壽六十有一有男三人繼智繼美繼志與繼仁而四孫男七



人秉公秉彛秉倫秉正秉直秉剛秉純葬以喪歸之年  
四月十九日墓在岐溝之原去涿城西南三十五里銘  
曰昔令今丞險夷殊方或留或從毋罔不寧毋若有言  
汝滂我滂曷養弗終而歸其喪于嗟乎張



容春堂後集卷四

欽定四庫全書

集部

容春堂後集卷五

六

詳校官監察御史臣曹坦

中書臣劉源溥覆勘

覆校官中書臣康儀鈞

校對官中書臣楊世綸

謄錄舉人臣史堂

欽定四庫全書

容春堂後集卷五

明 邵寶 撰

墓誌銘 十四首

華室鄒氏墓誌銘

鄒華皆錫鉅族相婚姻久矣鄒出宋道鄉忠公華之望  
則有若晉孝子寶者鄒於忠公十有一世矣在國朝有  
曰璋字伯惟以力田孝弟聞者鄒之大父也父普字洪  
道母周氏鄒生有淑質三歲喪母鞠於祖母孫以謹承

愛繼母鍾愛之如孫於是洪道與諸兄同居諸子女日習華侈鄒獨不屑效年十八歸鵲湖華封君守莊之子文耀封君性凝重嫡姑楊氏佐以肅鄒事之得婦道甚時封君自鵲湖遷今塗林田廬草創而內外交侮文耀侍封君應役於公鄒侍楊紡績於家計其功如古所謂月得四十有五曰者少暇則說小學故事以代談笑祖母姑鄒居故宅鄒侍楊偕省罔寒暑間鄒稱其孝封君晚委家事於文耀鄒實專內事黜華勵勤業日以裕凡時

祀治具必躬或勸屬諸媵婢鄒曰非敬也凡延師教子其所稱贊必以手治縑布或曰物乏歟奚用是為鄒曰不然將吾誠耳其知義如此每義舉必稟楊命楊意所欲輒先加惠其所不欲必婉勸以致焉嘗念洪道翁晚居蠡湖別墅雖自以為適而遠於家人力勸以返比卒得正寢之道鄒之力也鍾母病疽卒當暑穢甚鄒親飯含不厭君子稱鄒善事舅姑必及是謂之有本娣從叅政於官鄒獨事封君暨楊久於壽康有與焉楊病勞於

侍楊沒封君繼之子婦錢又繼之文耀又繼之不勝哀而病未幾卒卒之日為正德甲戌正月己巳後文耀四越月距其生正統己巳十月五日年六十有六子男四人長球先卒娶談氏繼朱氏次琳亦先卒娶梅氏次瓚娶鄒氏繼錢氏俱先卒今聘王氏次瑄庶出孫男三人長磐聘鄒氏次礎次確女一人許嫁鄒崇慶華自孝子二十七傳為諱璞者在元授晉冀屯田總管不就其子子舉任功德司都事子舉生彥清別號栖碧彥清生公

愷別號貞固皆處士於文耀為高曾祖公愷子仲諄孫  
思濟世有惠德封君思濟第五子也以子叅政貴封戶  
科給事中配楊氏封孺人叅政名景文耀母弟在諫垣  
有直聲謂鄒孝書來自蜀屬余銘墳卜卒之明年十二  
月二十有一日葬鄒於塗林西原之祖塋合文耀兆銘  
曰瞿瞿封君其子克肖若人維婦亦克遵教於宗乎有  
耀

華冢婦鄒氏墓誌銘

錫之鄒皆系於宋忠公浩之弟洞自洞至國朝餘杭知縣可達凡五世可達子景懋娶武進李氏生二女鄒其長也長歸於華為文吉甫配華之望以晉孝子寶舊矣其在近世以肥遯稱者則有若貞固處士某貞固之玄孫守正號能亢宗文吉名佑為守正冢子鄒甫十七來歸族之人皆謂閑於禮儀時守正翁強且習事見祠堂祭薦曰豐且潔矣維冢婦故見賓客供具曰隆且飾矣維冢婦故及視其物曰魚肉爾曰棗栗爾無珍異者及



其衣服皆然他器具無不然則又喜曰何此婦能遵我  
貞固家教哉於是景懋衰矣其仲女適文吉從弟文高  
者聚而謀曰弱弟侍鰥翁某等遠莫能朝夕柰何乃各  
告其夫稟命尊長築室黃塘西以居景懋贍以田若干  
畝日饋月省凡若干年而其弟某長還翁於家以卒鄉  
人謂是舉也義且有禮焉先是鄒育而不再以嗣為憂  
告文吉曰盍圖諸文吉未應守正翁曰婦言是也故海  
虞曹氏貳室於文吉連得子女鄒愛如已出鄒病嘗劇

議散其貲賄文吉意鄒私其女也勸勿他及鄒曰承宗者子顧可輕乎遂均與之先子後女鄒在華凡若干年中歲有族訟文吉父子兄弟奔走在外不遑內顧鄒以其姑呂力持其家比訟畢守正翁曰吾可以逸矣鄒相文吉力家政為翁圖逸者無不至晚當舅姑及夫凡三喪繼舉咸襄既而事歸其子益凡若干年至正德癸酉夏五月十一日以疾卒壽七十有七男女四人鄒出者為一女適鄒炯曹出者為二男曰鯨娶鄒氏曰崇聖先

天為一女適錢仁術孫男七延壽延禧延齡延慶延祚  
延福延祿女孫五俱幼鯨以卒之又明年十二月二十  
日葬於椿楓山之原合文吉兆鄉葬之一月介吾門人  
錢諷以銘請為之狀者李虞衡汝璧予最其事為銘銘  
曰養不以父加諸翁惠不以女加諸子君子謂夫鄒也  
士而不婦蓋徵諸此

喻君惟敏墓誌銘

正德十年十有二月二十有一日喻戶部義葬其父惟

敏君於錫麓之先塋先是君以四月十有七日卒越三月義聞報歸自京師至是襄事而請銘於予義始魁鄉試有文譽既舉進士授今官端慎加焉其在苦次銜哀讀禮予重嘉之於是乎銘君諱銳別號鶴隱惟敏其字喻其氏也其先祥符人宋工部員外郎玉泉先生樗自桐廬徙居無錫十二世至君君高祖中曾祖昇祖綸父山母陳氏君生秀偉沈毅童如成人祖嬰末疾扶而后能起哺而后能食君侍之者十寒暑而終人謂慈孫既

有室暨厥兄弟各事事以孝養厥父母長姊嫁賀賀有  
急君極力周濟姊卒於家歸其喪於賀葬之父病君親  
嘗湯藥侍食與衣唯謹比卒君方卜葬地其季弟鎮以  
誣繫郡獄君力為訟雪而內持其家葬以故緩及弟釋  
歸父夢君曰錫山下有地南某北某東西某可以厝我  
越明日君往訪得之母異焉曰我義同穴即當從之君  
力解乃止越數月母無疾卒合葬之日會者以為談既  
而謀諸兄曰先玉泉為宋名臣傳在國史祠在鄉賢嗣

德在我後人義資可教教而成吾望塞矣兄笑曰人言  
弟癯如鶴冲霄之翼不以自試而望而子乎由是以經  
學課義晨夜無遺力間語之曰恕人量廣審事盡成將  
而勿亂見而勿貪我深念此而未能有得爾其識之數  
歲義學進試得魁選人方賀君君曰未也揚休樹烈不  
有先達者乎比得進士人又賀君君曰未也秉德守道  
不有古君子者乎先玉泉遺槩其易武諸其易武諸於  
是君遺痰鬱之疾力貽義書固以玉泉為勗邑大夫以

登科報至君猶北向就榻叩首曰君恩渥矣何以當之  
蓋去卒七日耳其知禮如此先卒一日揖其配吳與訣  
曰語大兒無忘初心復謂諸子曰善事女母事汝女兄  
無遠邇小大君壽六十有三子男五長即義戶部主事  
次禮次遜次信皆吳出次敬別出女二適張貴馮鵬亦  
吳出孫女一受楊涇聘凡君之行予得之鄉貢進士楊  
君致時狀者與所聞皆合銘曰粵若玉泉流衍於錫既  
久而弘將川將澤維源之長亦導者之力我銘識哉尚

觀其極

明封徵仕郎府軍衛經歷李君墓誌銘

君諱玉字韞之李其氏也以子綦貴封府軍衛經歷階  
徵仕郎其先居武進馬跡山七世祖得十在宋慶歷間  
稱有行義者四傳至肅君之大父也當元季盜起山人  
負湖險尤縱劫掠有以所得遺肅肅輒麾叱之曰吾即  
餓死不願受此且復諭以利害蓋什有一二改焉或犯  
而匿官謂其籍附肅下乃於肅之子徵之肅大呼於山



曰若為不義罪不自承而以累人乎其人聞而嘆曰是固嘗諭我善言者吾忍負諸乃出就死其感人如此肅生名名娶某氏生君既長以馬跡居湖中地不勝民且出入風濤非便逾湖而西為宜興地山深水清中多腴田盡往居焉遂卜城南為今居力穡起家加以儉勤漸致饒裕既乃命其伯子共役於官其季輔之而以仲為諸生或游於庠或耕於野初有中人產晚年乃累鉅萬然觀其室廬則朴而固其衣服則素而雅其飲食則約

而恒其童僕皆恂恂如也論者謂之本富擬諸漢力田云既而諸孫漸長禮延塾師以經學教之每鄉人燕集輒相與談故事以自鑒戒復命諸子孫出聽或侮之則以理自遣始雖不平終則若罔聞者每有令輸粟自旌門至冠帶皆辭之或問其故曰吾樂吾耕他非所望也於是秦例入太學為京朝官耕樂之名遂傳於人名卿大夫為之賦詩者若干人今大學士丹徒靳公為記蓋秦志也而君之所存彰矣君卒以正德甲戌四月二十

有二日距其生正統丁巳十二月二十有六日為春秋七十有八配徐氏封孺人有子男三人長華義官次即綦歷官府軍衛經歷終寧海州同知次萃例授鎮江衛千戶先二年卒女子一人適吳輝孫男八人鎰鈇鉞欽鎬鈞鑑鉉鎰鎬皆太學生女四人長適談綦次黃元次邑庠生黃廷璿次吳士曾孫男四人女二人君卒之明年乙亥三月十有六日葬龍潭嚴墓之陽綦以華言來乞銘予昔為戶部今少宗伯寔庵吳公在翰林予燕飲

其第嘗見蓁焉今不見者十有六年矣予病餘有感於斯而鎬也又吾門人華從龍友也為之申懇不已乃按庠生卜某狀而為銘銘曰始家具區載卜陽美去險即夷厥心乃見山邪水邪我耕其中終焉一邱繼我其封之

鍾恭人墓誌銘

恭人鍾氏都察院右副都御史致仕魏公士華之配也初公以進士為太常博士恭人始封孺人既而為御史

為湖廣按察副使按察使江西雲南布政使至今官副  
使一考有異政恭人受誥得今號恭人出慈溪名族大  
父曰霈父曰綸皆鄉望也母章氏恭人生有淑質幼能  
誦詩書笄而歸以孝稱於舅姑以肅睦稱於娣姒宗嫻  
於是公在庠校未幾登進士第歷官中外凡三十五年  
自臬以前恭人皆從藩以後則留於家其從也公有內  
助其留也公無內顧君子謂是封也稱公嘗夜讀恭人  
侍無怠適至鷄鳴詩公笑曰爾若而人哉恭人曰何敢

然敢不勉比在官恭人嘗謂公曰祿當求稱若食浮於人君媿之吾亦媿之公領謝焉公二兄一弟先後暨其室早世遺孤女四人男一人恭人母之婚嫁惟時不惟其儀惟其教人謂其儀可能也其教不可能也恭人既封猶續或曰何自苦如此則舉古人鴆毒之言為謝非令節望祝不御命服燕服雅而必飭急於周乏自族姻至於隣黨蓋多感其惠者公屢為予言今讀楊方伯名父所為狀無間於公恭人卒於正德辛未十有二月一

日距其生天順辛巳十有一月九日年纔五十有一子  
男二人長光嗣太學生娶周氏次充嗣娶余氏女二人  
長歸名父之子孫斯次聘於禮部郎中向中美之子璵  
孫男幾人恭人之卒公巡撫貴州越二年癸酉十二月  
二十日公歸而葬之至是公命光嗣請銘予在湖廣與  
公為東西寮政暇胥會嘗辱有有道之褒因公以及其  
室固亦不能靳也銘曰妻道配地成以代終魏宗有慶  
賢哉伯鍾孰謂無儀嘉號載封孺人維孺恭人維恭有

考德音吾銘是徵

西園毛府君墓誌銘

西園毛府君英懋者故翰林脩撰一峰羅先生之故人也其卒之三十有七年其子聯珮始謀銘於一峰之介子今江陰學諭榦榦吾門人也頃以狀來再拜請曰先生惠念先君宜無靳此予惟一峰不可見矣見其子且聞其所與者之詳如見一峰於今也予烏能無情哉初一峰謝病歸卜隱於金牛之洞金牛去邑百里而遠英



懋方遜地以居趨而往見一峰一峰曰若人知我乎英  
懋曰何敢公天下士也公在斯敢不朝夕几杖一峰與  
之言久而遂契如友既而弟子自遠至者日衆英懋曰  
盍我乎館既而裹糧有乏者英懋曰盍我乎饗殮每一  
峰講授必侍如弟子弟子固曰吾師之執也其所居室  
有扁西園清隱者一峰嘗為之記云府君諱徹毛其姓  
英懋其字西園其別號吉之永豐人自宋以來代有令  
人其幾世祖某與信國文公同時且獲交焉其書劄有

存者英懋生六年而父某沒母某氏繼之又五年而有祖之喪且大其兄祖母劉躬撫以長讀書好義為鄉善人事劉以孝聞既而喪焉以慎聞祀焉以敬聞於是歲積有餘以惠聞宗黨皆德之有圖其地而欲傷之者多遜弗免西園於是乎遷又有以稅役累者英懋出粟五百為償其逋天順壬午饑病瘴者十無一生英懋周旋其間藥而起者棺而掩者凡若干人歲憫道暍屋於衝濟以茶粥有道出寧都嶺谷峻深虎出不測英懋闢而

覽之凡里五十饑則發大饑大發存饑存發蓋英懋之  
平生如此晚見一峰識進而行益力焉嘗於金牛洞建  
春臺書院贍以茅坪之田比沒且屬其子聯珮勿壞君  
子聞而稱之聯珮嘗於空坑建相石亭表信國遺蹟亦  
英懋遺訓也英懋配彭氏先卒繼而室者五蕭程王劉  
遽子男六人珮琦輯璋玻瓈女一人適程昭奇孫男十  
人女四人曾孫十二人卒以成化某甲子年五十有九  
越明年某甲子某月某日葬陂頭山之原從先兆也銘

曰金牛闌而一峰壁而將若人覲而逝而逝而我心怒而

退庵張君墓誌銘

君先予受書於蒿庵俞先生比予及門先生猶稱其勤予初還自許州君在庠有聲邑大姓延為經師見予喜道俞門事予再還自京師則君已謝進取不事予問焉君曰吾年且艾恥與後儁爭名矣居數年其子賢舉鄉試予聞之嘆曰君不自顯能使子無顯乎未幾予侍養

還則君受命服矣予問焉曰此賑饑令也予有少積方  
圖散焉馮令知我以義言激之予不敢辭既而辭服令  
謂我矯是以不卒辭也又若干年而君卒先卒之二年  
予卧病聞君月與姻友為奕之會每集道觀奕且酒以  
為樂或登臺倚樓聽羽人奏遊仙之曲終日忘返予謂  
君蓋能忘所謂世情者君廣顙隆準髻年如老成人日  
誦數百言尋以家故輟學後復自奮以成從君遊者多  
有聞君事父母繼母孝與兄及諸季友有析產後資其

殮葬者或召還鞠之各置之所君疾亟勉起坐與家人  
訣戒諸子孫如平生又曰人之將死多談鬼魅予嘗謂  
之誣今信誣矣君諱仲方張其氏式之其字退庵其別  
號也君高祖茂茂生友新友新生道叙道叙生孟庸是  
為君父孟庸娶崔氏有子五人君其二也君生景泰癸  
酉六月二十七日卒正德丙子正月十四日年六十四  
配惠氏子男三長即賢娶陳次德娶于次忠娶素女亦  
三長適唐珪次適苗龍其幼者庶出受鄒某聘孫男七

承祿聘趙承福聘許承祥聘浦承爵聘尤承壽聘俞承祚承寵未聘女四長受邑庠生尤魯聘次受談有倫聘餘幼君卒之明年丁丑某月某日賢等葬君惠山祖塋之次先期介吾門人鄉進士丁仁夫來以銘請予乃撫喻主事宜之狀叙而為之銘銘曰于嗟君兮經以師子子方進旃而君則止君兮君兮瞑以此兮

故上高訓導徐君東之墓誌銘

君長於予予夙知君至江西而深予去江西之明年君

以母病乞致仕巡按御史某重其去遲留未決君一日  
入告曰某也才地無復用理公乃過為計乎惟速之一  
日則惟吾母一日之幸御史感焉遂允之過浙臬語予  
甚詳越七年予以侍養歸尋疾君來問歲至再今年忽  
得君訃予哭之以詩亟遣人弔其孤越數月君弟鴻以  
其孤本及壻潘漆來告葬且出段主事子辛狀請銘烏  
乎君嘗以吏為屬謂予知己而稱門生銘其能辭君諱  
淮字東之別號靜軒徐其氏也系出漢南州高士穉元



有諱燬者仕為常州路織染局提領因籍武進於君為  
高祖曾祖用國朝以明醫徵祖遂醫學正科父鎔母黃  
氏君幼警敏成童能屬文弱冠為郡庠諸生有才望於  
是君之世父文式以進士及第為翰林編脩沒未久而  
君繼起嘗居學舍隣鷄入焉君為文逐之名之曰鷄斷  
人有傳者君尤究心世務識出流輩不啻倍蓰上官問  
焉則對疑焉則釋侃侃必盡君凡八舉不利始應弘治  
戊午歲貢以母老請就祿得訓導江西上高居八年母

病失明遂有致仕之請君為教務盡道理歲時贄物一無所問貧者顧有資焉凡君所指授多就矩度予嘗上君狀於巡撫都憲林張二公林公三檄君署縣皆辭張公至首旌勞之進必與坐語退送之門蓋前此未之有也按治諸御史暨藩臬長貳皆然事在瑞州府志君初無子有女許嫁潘溱溱孤君挈之上高躬督教之既而子本生若干年而君歸歸數年得軟足疾又六年丁母之喪喪畢而足亦少愈然卒不良於行鄉大夫為逸老

會強致君偕君不至雖飲不樂也今郡守宜賓王侯高  
君之節以俸米檄縣即君家為問君子謂王侯知人君  
詩長於選澹而有思文亦典則所著有靜軒稿藏於家  
君生景泰丙子八月三十日卒於正德丁丑五月二十  
七日得年六十有二配楊氏子男一即本側室陸氏出  
娶庠生索儒女儒索州府通判前太常典簿嵩子也女  
一即漆婦墓在某之原從先兆也葬以卒之年某月某  
日銘曰以官為師道固在我彼徒利云我則不可位卑

言昌其譽孔揚歸病且愈而弗卒杖於鄉云胡不傷

梅坡張君配郭氏墓誌銘

張太學生輜以其父梅坡君意來請銘其母郭之墓手  
自為狀亦父命也郭為吾里先輩諸城公之女子幼嘗  
及見公公沒久矣其女且老而予銘焉能無感乎抑張  
氏父子之屬之懇尤不能辭也蓋狀之稱曰吾母氏郭  
吾外祖父諸城知縣吳以鄉貢士初官黃巖訓導外祖  
母彭實生母於黃巖母幼穎惠貞靜未幾彭亡事繼母

錢如母年十七歸吾父時吾祖父怡庵府君已沒母恨弗及事常自嘆曰傷哉命也女吾無母婦吾無舅傷哉命也繼之以泣春秋享祀供饋必親婢請代不可曰此不用吾誠孰用吾誠者奉吾祖母鄧躬紉裳衣食飲嘗而後進祖母多疾信禱而畏藥母順其志蓋三十餘年如一日卒而殮葬祭皆相父以禮初吾父生十三年而孤家盡於火母甫歸即脫簪珥以佐日用比業稍復父好居室且多致賓客或曰費盍止諸母曰止而弗聽如

婦順何吾固重吾言也何氏姊死有孤在抱母曰盍我  
為養既長曰盍我為娶成氏姊死有遺孤三母曰盍我  
為教遷而隣焉舅氏昆季雖異出皆助其嫁娶至於延  
師集友自吾屢試屢黜至卒業太學贅幣館穀歲勤無  
倦母以哭妹致疾疾革矚輜曰汝知諺所謂將軍柱者  
乎汝是已蓋不肖得於見於聞者如此吾母生正統己  
巳三月三日卒於正德乙亥三月二十八日壽七十子  
一即不肖輜吾婦章布政叅議常熟某字公女女五長

適義民過錫次適成浩次適何滋次適太學生王舉先  
卒其次側室出適義民朱珣孫男一曰懌娶義興堵指  
揮邦寧孫女女一適同里楊著都憲宜閒公諸孫也墓  
在長腰山東灣新阡葬以卒之又明年十二月十一日  
蓋狀之稱如此梅坡君名某字某云銘曰知母者子孝  
子不誣維其不誣是以為遠圖兮

錢伯子墓誌銘

華蓋出宋戴公宋子氏也今其族在天下無錫為蕃且

盛近齋君文遠華之良也鄉有南北錢族望與華埒而世相婚姻近齋娶於北錢而與南錢味泉翁孟澹雅相重故子氏歸翁之介子世喬越若干年年三十四以疾卒於是近齋病初愈聞之哀甚圖所以銘其葬者乃命子之弟鄉進士企說為狀來請子貞慎儉勤織紉縫澣合古女則近齋之父聽竹公嘗謂諸子曰之子有家其宜哉及歸事味泉翁暨嫡姑楊氏及姑馬氏皆稱之如聽竹言世喬兄世徵長且倍或疑其難為弟也子曰何



虞第盡弟耳屢以無相猶為世喬勸卒稱弟弟世徵沒  
有孤女子携以歸育之與已女等於是子有子矣世喬  
在太學庶子詢者方娠其母以舉不舉請于子子曰此  
莫非吾嗣若之何不舉既生育之與已子等母錢早世  
每歸寧則依依祖母之側而致愛敬於近齋若在室然  
候問之嫗日屬於途少聞不安節則戚戚不寧其垂絕  
也戒家人曰吾父病聞吾死能無重傷其心乎報之母  
遽烏乎子誠賢哉子有二子曰訪聘鄒邦美女其次即

詢聘華企益女女一受華騰霄子某聘子卒以正德乙亥十月六日越二年丁丑閏十二月十四日世喬以葬於舅姑之墓之側鄉曰垂慶原曰某原世喬名標太學生其請銘也吾友浦君文玉實以企尹來予辭焉文玉曰子也少敢勤公筆公儻念其賢而天無亦賜一言以慰其父兄夫子乎予感焉乃叙吾昔聞於世喬之從兄戶部君與今狀所稱尤賢者一二事而繫之以銘銘曰吁嗟子兮死懼傷親生如之何生亦無幾而淑也則多

吁嗟子兮

鄒君肅端暨妻錢氏合葬銘

有序

正德丙子冬十月二十二日泰伯里鄒君肅端卒是夕  
其妻錢氏亦卒明年丁丑冬某月某日其子契葬君於  
寧山祖塋之次錢氏合焉禮也鄉葬之一日契從其妻  
之父鄉進士朱君廷補來請銘其族叔祖南豐訓導惠  
之為之狀君諱弁姓鄒氏肅端字也晚授承事郎其曾  
祖洪昭其祖以善其父德字輔之其母周氏其兄弟三

人君為之長錢與君生同年月歸若干年年皆六十有一子一即契孫男三某某女一君幼警敏讀書能強記稍長習於儀弱冠家事及焉於是輔之嬰心疾久矣居常忽忽非人情不可測君入承顏色出應門戶調劑繡縫歸於成務人殆不知輔之之為病者蓋如是若干年而周卒又若干年輔之卒先是母念弟貧君生為館之死為之葬念妹寡養之終身及其女不衰故周卒無遺憾者兩弟請異室君以田園室廬圖書服器僕從舟

輿馬牛物而三之以弟悅為悅曰此吾母之命也吾父  
雖病志亦宜然吾何敢不承弘治中饑君入粟當受服  
辭不可則請以族老之有行義者一人受之正德初勸  
分令再下君乃受服君年三十餘錢與諸媵皆無子乃  
議所後昭穆叙矣或以親疎為言君曰行之弗可瀆也  
為父子也無瀆於行而以嗣雖疎不猶愈於需乎於是  
君從弟勲之子契方在襁君卜日告族人抱而見於祠  
堂擇傅而有之既而朝有建議著之令者與君志合君

曰吾固謂當有是論者謂君前善處父後善處子錢有相之道婦德於是為大鄒宋忠公浩之弟洞之後錢祖吳越武肅王鏐錢之父曰惟實圓通之望也母華氏南齊孝子某之裔蓋無錫稱三舊族者銘曰道在邇兮變則難人不於斯兮又將奚觀維處之善兮維質之美亦維心之安孰爾淺兮肅端

明故山東冠縣知縣楊君墓誌銘

君諱溢字宗謙姓楊氏別號晉齋世為武進前黃里人

曾祖名之祖仲文父厚自號卷石母錢氏君生十九年  
遊郡庠累應鄉試以廩膳生應例入太學弘治己酉舉  
於應天丙辰舉進士觀都察院政尋選浙江會稽知縣  
癸亥當入覲上官有擬調君者會稽故難治君亦厭之  
遂自陳吏部冠縣於是乎調居幾年丁母憂歸會逆瑾  
用事凡官嘗調者悉罷之吏部請凡出甲科優於學者  
改遷教授凡若干人君與焉於是君服闋未起明年瑾  
敗還君故職召擢至君力辭致其事郡縣不能強也初

卷石翁病疽時天大寒醫難為治君日夕侍手拭弗替至以口吮旬月乃愈翁謂君孝楊故大族君以上同居者五世君鄉舉後從兄弟十有二人物故者六七君恐食指日繁規業或弛為前人累乃用古異室禮謀析焉公平周悉退無後言論者謂君知義會試得報賀者在門君獨憑闌流涕或問之君曰吾先人教子望在今日而弗之及也奈何弗悲母喪屏浮屠不用惟墓事是隆郡守連世昌稱重之遠適野送其葬君在會稽有積逋



當追君寧受殿考弗為加亟在冠縣專任德教興學勸  
農竊攘屏却民皆感悅比君歸遮道留弗得追送百餘  
里君宦情素薄聞罷且調夷然不少為意晚幸得謝治  
後圃為池臺客至則相與哦燕終日客去蕭然獨坐書  
策筆硯不去左右自謂老生故態所著有災祥便覽晉  
齋藁藏於家君卒正德丙子四月十七日距其生景泰  
庚午九月二十四日得年六十七配錢氏初無子以從  
弟愷之子城嗣繼而側室潘生子墉與城為二城娶朱

南康啓東女壻娶唐給事用思女女三皆錢出長適陳  
僉憲某字孫邑庠生誠次適王都憲希曾子中書舍人  
昇次適孔少叅宏章子密孫男六銑聘太學生夏元吉  
女銑聘太學生賀汝勉女錡鑒某某未聘女孫四長受  
白康敏公孫誨聘次受蔣侍御元貞子瑄聘次受太學  
生王文貞子某聘餘幼君葬以卒之明年丁丑十二月  
二日墓在原塘新阡君所自卜也君舉進士之歲予同  
考會試蓋識君久矣至是城壻以周僉憲仲鳴狀來乞

銘吾甥吳汝憲君從甥孫也實相城墉以請銘曰前稽  
後冠孰易孰難無於地觀當於民觀或仕或已何愠何  
喜觀無於人無亦於已延陵之野井彼有疇或勤敷畱  
而什乃五收伊嗣歲之秋

明故中憲大夫浙江按察司副使高君墓誌銘  
正德辛未予在戶部奉命兼僉都御史視漕舟於北河  
時曾唯高君以郎中從明年壬申君擢浙江按察副使  
又五年丙子君考績京師歸道得疾六月一日至丹陽

南數里卒其兄江西按察僉事舜穆逆其喪歸越三年  
戊寅三月三日葬於黃山先塋之次舜穆手為狀來以  
銘請烏乎予知君者予不銘而誰哉君諱貫曾唯其字  
別號恕齋系出齊公子高後世居濟南之歷城初祖宋  
銀青光祿大夫逸民扈蹕而南至江陰留籍焉七傳至  
江陰州教授雲卿支屬寢衍鄉稱其居曰高巷又三傳  
入國朝曰升之者當兵亂後再立門戶於君為高祖曾  
祖彥恒祖鵬運有孝行父某號希庵績學未舉以君貴

累贈戶部員外郎母邵氏累封太宜人君生符夢祥色  
氣英偉與羣兒嬉獨被繡襦為統領之狀見者異之弱  
冠入縣庠與舜穆並有文名偕舉乙卯鄉試己未得進  
士尋以省母告歸辛酉授工部都水主事分治三沽諸  
牐多所興革其大者釐正蕭碣豐沛滕五邑歲役夫脩  
昭陽湖隄滙泉以濟漕涸又脩沽頭南北隄為橫流蔽  
民田獲利流移復歸事具所著黃河圖纂往來怙勢者  
聞風斂戢隱然為河渠重者三年乙丑改刑部廣東司

實分治禁衛君取舍重輕惟法民用不寃丙寅奉命錄  
囚江北諸郡進署員外郎六品再考實授員外郎戊辰  
進署郎中時宄瑾焰方熾君矢共職不阿有百戶張福  
者訟而抗往愬之瑾瑾下君詔獄既而邀重賄將復之  
君謝不應遂謫知遼州君因俗為政歸之禮法若脩復  
廢墜往往有出常格者庚午瑾誅遷戶部廣西司員外  
郎民攀泣留履以詔恩加贈封典辛未進浙江司署郎  
中是秋劉賊焚掠運舟君時從予以敏習為諸同事所

推事在部牘君之遷副使也劉賊方南擾江陰而江西賊且奔突浙境君過家即之官會巡視都御史陶公初至君巡衢嚴道首劾叅將李某失機按察使缺君署篆數月憲度貞肅同官有以門禁故至大詬者君不為變既而其人以他事逮下詔獄詞濫及君卒不果逮中監某在市舶雅敬重君比遷鎮守意屬心脅而君顧疎之於是請託之弊不戒而息舉廉黜貪各得其情御史上君狀既考最進階日且超擢而君不可起矣君英敏方

毅孝友夙成臨利害不惑敏遜好學仕而益勤在沽頭  
遼州日有程課且進諸生而講業之其在戶部為尚書  
孫公侍郎喬公所知凡大題奏必屬君以藁君欲置義  
田顧力不足乃始以百畝而自為計大略謂斗石之粟  
十之助可十人猶愈求豐而埃也痛希庵不逮養焚黃  
之日伏塚悲慟久之事邵太宜人昕夕以懽舜穆官江  
西嘗以法忤勢家時其入覲圖構黜之或告君使為行  
賂祈遷君不聽見執政力辨不辟會舜穆以靖冠進右



叅議致仕君喜曰事白矣比還浙遇所構者峻絕之曰  
吾不能匿兄怨與見也弟贅以鄉貢知崇安而卒長其  
孤女而嫁之妹適邵孔述為之資送二女許嫁固違富  
室之請皆歸之士人君生成化丙戌十二月八日年五  
十有一娶陳氏德稱其配累封宜人嗣子季生於屬為  
再從子聘陳氏女三人長歸吳淳次許薛文治而天其  
一方在抱側室某出也所著有恕齋藁藏於家銘曰爰  
有利器若古干將既貞且剛于盤于錯亦既屢嘗盍歸

上方以辟無良天也胡然而中道戕厥則何病器之者之傷

明贈承德郎刑部主事李君暨三配合葬銘

有序

正德丙子夏六月某日吾郡守李侯廷重之繼母張氏以疾卒於官舍秋七月廷重以其喪還開州於是其父贈承德郎刑部主事以誠君葬州南慶祖鎮之東原若干年矣初君配吳氏先葬於斯繼室贈安人孫氏亦從焉張氏其再繼也歸若干年而君卒至是又若干年乃

合葬禮也廷重孫出也張實育之幼忘其孤長能力於學比舉進士知蘓之長洲縣張就之養相廩勸慎嚴若父師居二年當逆瑾用事濫逮廷重下詔獄邑民憐其貧也斂白金若干將遺張往賂求免張聞之曰吾兒無罪今欲加焉若權奸何進退有命賂焉用之如以賂滋益罪也謝不許既而釋未幾用部使者薦召為刑部主事尋署員外郎郎中擢知東昌府以才調常州張訓之如長洲君樸諒疎豁性喜飲酒不可羈以事或勸殖產

不聽獨知教子廷重生六年入鄉校至君卒凡十年課督歲加臨終猶以屬張張謹志之不忘故今稱廷重賢者必及張謂之能母君姓李氏諱成以誠字也世為大名之開州人歷宋元至今鄉稱巨族祖寬有士行父敬尤好義母賀氏君生正統辛酉十一月十一日卒弘治乙卯正月三十日年五十五三配皆開州人吳蚤世孫慈惠宜家卒時年三十八後以廷重貴偕君受贈張生景泰乙亥六月二十日年六十二子男一人即廷重名

珏娶秦氏封安人孫男二易旭女二皆幼君與吳孫葬  
各以時今啟而合在丙子某月某日廷重將行乃為狀  
屬李訓導時鳳來以墓銘請予知廷重久矣而能勿重  
其所生也哉且合葬重事也銘惡乎辭銘曰顓頊之墟  
泉流沍沍民重矜節太史實云我思古人而銘李君君  
墓歸而三耦從之永世以不墮

容春堂後集卷五